

# **Pengaruh Solat Yang Diperintahkan Terus Oleh Allah Kepada Nabi Muḥammad dan Kepada Masyarakat Dalam Masa *Mi'rāj***

Di mana-mana tempat pada 27 Rajab umat Islam memperingati *Isrā'* dan *Mi'rāj* Junjungan kita Muḥammad (S.A.W) bagi menerima kewajipan fardu ain yang sangat penting iaitu solat lima waktu sehari semalam langsung dari Allah Tuhan semesta alam.

“Maha Suci Allah, Tuhan yang menjalankan hamba-Nya (Nabi Muḥammad (S.A.W)) pada malam hari dari Masjid al-Haram (Mekah) ke Masjid al-Aqsa (di Baitul Maqdis). Kami berkati sekelilingnya untuk kami perlihatkan kepadanya sebahagian daripada tanda-tanda kebesaran kami; sesungguhnya Dialah Tuhan Yang Maha Mendengar dan Maha Melihat.” (Maksud al-Qur’ān *Sūrah Isrā'* ayat 1).

**(Dipersuaikan dari rencana saudara Mohammad Natsir, Ketua Masyumi di Indonesia)**

Pada waktu terjadinya, pada waktu sekarang dan seterusnya pada masa yang akan datang bermacam-macam penerimaan orang kepada kejadian yang luar biasa ini. Ada yang menerima dengan *amanā wa sadaqanā* (kami percaya dan kami benarkan; ada yang tawar menawar lebih dahulu baru menerimanya; dan ada yang enggan sama sekali sekalipun diberi bukti dan kenyataan).

Banyak tauladan yang didapati dari perjalanan itu yang semuanya mengandungi kebaikan baik dalam perkara ibadah terhadap Tuhan mahu pun urusan muamalah pergaulan dengan sesama manusia.

Perhatikan bagaimana pentingnya *Isrā'* dan *Mi'rāj* itu yang kalau dikaji tepat benar di dalam keadaan kita sekarang ialah tentang *athara at-tawhīd* (bekas tauhid) yang diputuskan dalam ibadah solat lima waktu mengalir menjadi *'amal mu'āmalah* yang besar faedah dan guna bagi peri kemanusiaan.

Pertalian Nabi Muḥammad dengan Tuhannya mengatasi kepentingan dirinya sendiri dan terhadap semua madah kebendaan. Pertalian itu kebanyakan diperhubungkannya dalam **solat lima waktu** yang diterimanya dalam perjalanan *Mi'rāj*.

Ia menjadi pusat kekuatan batin, tempat mengisi roh tauhid hakiki terhadap *Khāliq* sehingga bersih daripada kutu-kutu syirik yang melemahkan jiwa. Kemudian ia mengalir menjadi *'amal mu'āmalah* kepada makhluk di dalam perilaku yang adil jauh daripada perbuatan jurang, rendah dan nista, bahkan dengan baiknya pertalian kepada Allah yang dilakukan dengan perantaraan itu, Allah baikan *'amal mu'āmalah* terhadap makhluk:

**“Pertama-pertama yang dibuat perhitungannya atas diri seorang hamba pada Hari Kiamat ialah perkara solat.**

**Apabila sempurna solatnya nescaya sempurna amalnya.**

**Apabila rosak solatnya nescaya rosaklah segala amalnya”**

(Hadith Riwayat Ṭabrāni).

Daripada jiwa yang kuat tauhidnya, beriman sungguh kepada Allah akan tetap mengalir perbuatan mulia dan terpuji. Ia tidak hidup untuk kepentingan dirinya sendiri tetapi untuk manfaat sekalian, semua yang tergolong makhluk Allah, dan hampir terhapus daripada jiwanya sifat-sifat jahat dan rendah. Kerana itu timbullah dari jiwa yang telah bersih itu sifat mengutamakan kepentingan umum lebih dari kepentingan dirinya sendiri,

reda berkorban, ikhlas menyabung jiwa untuk kebajikan umum.

Seseorang Mukmin yang sungguh bertauhid kepada Allah tidak akan mahu berlaku zalim, sebab zalim itu menentang salah satu sifat Allah, yaitu adil. Ia tidak pula kasar dan keras kepala sebab Tuhannya bersifat *al-Rahman al-Rahīm*, Pengasih Penyayang. Tidak pula berlaku dusta, berlaku nifak sebab ia kelak akan mengadakan perhitungan di hadapan Allah yang bersifat *al-‘Alim al-Khabīr*, Maha Mengetahui dan Maha Luas Pengetahuan-Nya: **“Yang Mengetahui kecurangan dan apa-apa yang tersembunyi di dalam hati.”** – (Maksud al-Qur’ān *Sūrah al-Mu‘min* ayat 16).

Tidak pula ia berasa lemah, hina dan penakut, sebab ia mengetahui yang demikian itu tidak ada gunanya kerana semua perkara terenggam di tangan Allah.

Dari sifat-sifat mulia demikian terbitlah cabang menjadi **seruan** dan **ajakan** untuk kebaikan dan perbaikan umum sebab jiwa Mukmin yang hakiki tidak suka dirinya sendiri dan diri manusia yang sekelilingnya rosak; dirinya selamat orang lain celaka, dirinya mengecap kesenangan, orang lain mendapat kesengsaraan – demikian itu bukanlah sifatnya.

Sebagaimana menyeru kepada tauhid menjadi suatu kehebatan bagi manusia, maka *athāra at-tawhīd* yang menimbulkan susunan hidup baru dan mengubah keadaan masyarakat itu, adalah lebih besar lagi kehebatannya. Bukti-buktinya perhatikanlah di bawah ini:

Orang gunung (badwi) yang beradat mengkuburkan hidup-hidup anak-anak perempuan dan memandang mulia menumpahkan darah, telah menjadi manusia yang sangat khusyuk dan *taḍarru‘u* kerana **mengerjakan solat**.

Keluarga yang beradat mempusakai isteri-isteri bapanya, telah menjadi keluarga yang suci, menghormati dan memiliki kedudukan kaum ibu dengan erti yang sebenar-benarnya kerana **mengerjakan solat**.

Satu kabilah yang tidak mengenal kebenaran hanya untuk bangsanya sendiri, dan tidak menjaga hak tawanan dan tanggungan hanya kalau dari golongan sukunya, telah menjadi suku kabilah yang pernah mengembalikan harta benda kaum Nasrani kerana mereka keberatan memelihara orang-orang tawanan, kerana **mengerjakan solat**.

Bangsawan-bangsawan yang memperhamba manusia, telah menjadi golongan yang takut betul kepada Allah, tetapi tidak takut menerima celaan dan ejekan orang dan membela kebenaran, kerana **pengaruh solat**.

Seorang hamba Allah yang kasar, kemudian telah menjadi *khalifah al-muslimīn* yang disegani kawan dan lawan, yang pernah dibantah oleh seorang perempuan dalam khalayak ramai, sehingga khalifah tadi terus terang: **“Benar perempuan itu dan Umar yang salah.”** Dia pula yang pernah menulis surat kepada salah seorang gabenornya di Mesir kerana anak gabenor itu mengganggu seorang Kristian; di antara suratnya itu berbunyi: **“Mengapakah kamu memperhambakan manusia, pada hal ibunya melahirkannya dalam merdeka.”** Umar berubah menjadi demikian kerana **pengaruh solat**.

Bagaimanakah jalannya sehingga serentak dalam segala lapisan dan tingkatan terjadi perubahan menjadi baik dan menjadikan contoh tauladan oleh umat yang kemudiannya? Jalannya yang nyata kepada kita ialah: menyedarkan jiwa orang itu dilakukan sejalan dan serentak untuk dirinya dan untuk umum, kerana kepentingan orang seorang *“al-farad”* atau **perseorangan** bergantung kepada kepentingan *“al-jamā‘ah”*, **masyarakat umum**.

Perbezaan agama Islam dengan lain-lain agama ialah agama Islam tidak hanya mengatur peribadatan kepada Allah semata-mata dan meninggalkan penyembahan kepada yang lainnya, tetapi disebalik itu Islam mengatur pula susunan **muamalah**, pertalian dan perhubungan, hak-hak dan kewajipan antara perseorangan dengan keluarga, dengan bangsa dan dengan umat yang bermacam-macam. Dan dijadikan sasaran yang terutama, memperbaiki pergaulan. Urusan dalam ibadah

itu sendiri dijadikan perantaraan untuk menyampaikan perbaikan umum. Umat Islam dalam pergaulan umum adalah seperti mata rantai yang erat pertaliannya, sebagai tembok yang teguh meneguh, sebagai anggota badan yang kalau sakit sebahagian merasai sakit semua, bertolong-tolongan, bantu membantu bagi menolak segala kerosakkan yang mengenai perseorangan dan yang mengenai umum.

Menyatukan kepentingan perseorangan dan kepentingan umum, membangkitkan pendapat umum yang sihat dan baik, dapat dilakukan hanya dengan perantaraan yang tahan diuji. Apabila semua golongan telah menepati hak-hak dan kewajipan yang sah dan benar, nescaya pendapat umum akan menjadi satu dan kuat, dapat dialirkan bagi meluruskan mana-mana yang bengkok dalam masyarakat bagi membetulkan mana-mana yang salah keluar dari jalan kebenaran.

Golongan yang bekerja memperbaiki kerosakan masyarakat hendaklah lebih dahulu bekerja menyedarkan jiwa perseorangan untuk kepentingan umum dan menyedarkan jiwa umum untuk kepentingan jiwa perseorangan.

Perasaan kesedaran dan keinsafan yang halus tetapi kuat yang berguna untuk kebaikan masyarakat dalam semua lapangan, serta dalam segala masa dan zaman, boleh didapati hanya dengan benar-benar menanamkan perasaan tauhid kepada Tuhan Yang Maha Esa sehingga *athāra at-tawhīd* melimpah ke alam luas menjadi rahmat kepada sekalian makhluk. Hal ini dapat dilaksanakan hanya oleh jiwa yang memegang teguh *athāra at-tawhīd*, yaitu jiwa dan jasmani yang tegak, rukuk dan sujud kepada Allah – tegasnya orang yang **mengerjakan solat**.

Dalam saat ini, terutamanya di dalam keadaan dunia seperti ini, wujud solat itu akan jadi besar sumbangannya kepada kejayaan umat Muslimin. Inilah perkara-perkara yang wajib kita ingat dalam masa menyambut perayaan *Isrā'* dan *Mi'rāj* Junjungan kita Muḥammad (S.A.W).

Dipetik dari Panji Islam (27 March 1954).

## BUKU2 RUMI

### Siri Buku2 Bacaan Sekolah Rendah:

- |    |                                     |        |
|----|-------------------------------------|--------|
| 1. | Tunas Baru (ABC) Abd Rahman H. Said | \$1.50 |
| 2. | Tunas Baru I                        | \$1.50 |
| 3. | Tunas Baru I, III, IV               | \$1.50 |
| 4. | Senang Bacha I dan II, Hassan Basri | \$0.80 |

### b. Buku2 Bacaan Tambahan untuk Sekolah

#### Rendah:

- |     |                                    |            |
|-----|------------------------------------|------------|
| 1.  | Kuching Hitam oleh A.H. Edrus      | \$0.30 sen |
| 2.  | Peristiwa Hari Sabtu               | 30 sen     |
| 3.  | Nabi Sulaiman dengan Semut         | 30 sen     |
| 4.  | Lutong Sakti I dan II              | 35 sen     |
| 5.  | Karun Dengan Harta-nya             | 35 sen     |
| 6.  | Pekebun yang Tama'                 | 35 sen     |
| 7.  | Lembu Chantek                      | 35 sen     |
| 8.  | Kesah Minangkabau                  | 40 sen     |
| 9.  | Sutan Balun                        | 40 sen     |
| 10. | Puteri Balqis                      | 45 sen     |
| 11. | Penduduk Gua                       | 50 sen     |
| 12. | Sebab Harimau                      | 50 sen     |
| 13. | Cherita Burong Hantu               | 75 sen     |
| 14. | Nakhoda Dengan Datok Perpateh      | 30 sen     |
| 15. | Si-Buta                            | 40 sen     |
| 16. | Mimpi                              | 35 sen     |
| 17. | Si-Pengail                         | 45 sen     |
| 18. | Sulaiman Nujum                     | 50 sen     |
| 19. | Raja Ikan                          | 50 sen     |
| 20. | Mangga Hikmat                      | 75 sen     |
| 21. | Angsa dan Burong Merak             | 45 sen     |
| 22. | Abu Hassan Ganjil                  | \$1.00 sen |
| 23. | Ayam dan Musang                    | 35 sen     |
| 24. | Raja Bersiong (A.Ghani Abbas)      | 45 sen     |
| 25. | Lang Dengan Ayam (Ira Mara)        | 30 sen     |
| 26. | Ikan Puyu                          | 40 sen     |
| 27. | Semut Membalas Budi                | 35 sen     |
| 28. | Katak Yang Hina                    | 40 sen     |
| 29. | Bangau Dengan Singa                | 35 sen     |
| 30. | Badak Dengan Seladang              | 40 sen     |
| 31. | Si-Amang Dengan Raksasa            | 35 sen     |
| 32. | Kijang Yang Cherdek                | 40 sen     |
| 33. | Pertengkaran Bangau dengan Belibis | 35 sen     |
| 34. | Buaya dengan Landak                | 35 sen     |

Pesan kepada:-

QALAM

356/8 Geylang Road,  
Singapura, 14.